

– Ահա՛ քրդական բռնապետութեան ճիւղակտուր եղած կոճղը... – ասաց Ասլանը, ծերունու ետեւից նայելով: Յետոյ դարձաւ դէպի մեզ այդ խօսքերով:

– Ես իսկապէս հակառակ եմ ազնականութեան գաղափարին, բայց կը ցանկանայի, որ հայերը ազնականներ ունենային: Երբ ժողովուրդը զարգացած չէ, երբ նա դեռ մի ուրիշ գիտակցութեան չէ հասած, ազնականութիւնը միշտ յարմար միջնորդ է դառնում նրա բողոքը արտայայտելու, երբ ինքը՝ ազնականութիւնը, նոյն ժողովրդի հետ ճնշոած դրութեան մեջ է գտնուում եւ նրա տառապանքներին մասնակից է լինում: Նայեցէ՛ք այդ ծերունի քրդին, այդ ոտքից եւ ձեռքից զրկած անդամալոյծին, հազարաւոր քրդեր չեն կարող այն մտածել, ինչ որ դա է մտածում, հազարաւոր քրդեր չեն կարող այն զգալ, ինչ որ դա է զգում: Իր խրճիթի մարած օջախի նման միտում է նրա սիրտը, երբ իր ցեղի ազատութիւնը կորած է տեսնում: Երբ մենք ազնականութիւն ունեինք, երբ տակաւին բնաջինջ եղած չէին նախարարական տները, ամեն անգամ, երբ ժողովրդի կողմից բռնութեան դեմ բողոք էր յայտնւում, նրա նախաձեռնութիւնը տալիս էր նախարարութիւնը: Եւ մեր հայրենիքի թշնամիները՝ յոյները, պարսիկները, արաբացիք, վերջը թաթարները, լաւ հասկանալով ազնականութեան նշանակութիւնը, սկսեցին հետզհետէ ոչնչացնել նախարարական տները, որպէսզի կատարելապէս տիրել կարողանան մեր հայրենիքին:

Ինձ համար այժմ շատ բան պարզ էր: Ծերունի քրդի պատմութիւնից ես լիակատար տեղեկութիւն ստացայ Ռոստոյի անձնաւորութեան մասին, գիտէի նրա փառաւոր անցեալը, գիտէի նրա աղետաւոր անկումը, գիտէի նրա խորհրդաւոր ներկան: Ինձ համար պարզ էր եւ Ղարա-մեյիքների յեղեղուկ պատմութիւնը. ես ճանաչում էի այդ ազնական տոհմի վերջին ժառանգին՝ Կարօյին, ես գտնւում էի նրա հօր դժբախտ ամրոցի փլատակների մօտ, այն ամրոցի, որ սկսեալ Ռշտունի ախարարներից, քսանեամէկ դարերի ընթացքում, մի ձեռքից միւս ձեռք անցնելով, վերջը հասել էր նրա հօրը եւ որից դաւաճանութեամբ յափշտակել էին քրդերը: Կարօն նոյնպէս գիտէր այդ բոլորը, գիտէր իր ծագումը, գիտէր, թէ ի՞նչ էին կորցրել իր հայրերը: Բայց ես հաւատացած էի, որ նա նոյն եռանդով կը գործեր եւ նոյն անձնորութեամբ կաշխատէր սրբելու նեղեալների արտասուքը, եթէ գիտենար, որ ինքը մի անյայտ գռեհիկ որդի է: Երբ այդ միտքը յայտնեցի Ասլանին, երբ, Կարօյին օրինակ բերելով, ասացի, որ տոհմային ազնականութիւնը միակ պայմանը չէ, որ մարդ ձգտում է դէպի ազատութիւնը, նա պատասխանեց.